

四庫全書

集部

欽定四庫全書

集部

敬業堂詩集卷八

五至

詳校官左中允臣瑤五珠

助教臣常循覆勘

總校官庶吉士臣倉聖脉

校對官庶吉士臣吳裕德

謄錄監生臣湯師錫

欽定四庫全書

敬業堂詩集卷五

翰林院編修查慎行撰

踰淮集

起甲子四月盡一年

甲子夏遊學京師始渡淮而北客有賦涉淮以壯
余行色者敬謝之曰君不聞橘踰淮且化為枳乎
余方虞余之失其橘性而與枳為類也

歸自江右隨有燕山之行示別家人

南北勞勞但可唾流光瞥過少年時祇緣累世留門戶
那得此生無別離斗酒且禁連夕醉長箋難和送春詞
勿論向後愁深淺已覺燈前鬢有絲

錫山舟次遇外舅陸射山先生自淮南歸

落帆當溆浦曲岸轉拏音已感骨肉語兼傷去住心斷
雲晴出岫老鶴暮歸林莫作俱飄泊翁今白髮深

過二瞻兄維揚寓齋兄有贈行詩次韻酬別

征衫初換且停橈一日江程兩信潮欲去郵亭塵滾滾

乍來岐路馬蕭蕭詩文價定人爭購書畫船輕客待邀
劈紙風流看好在綠楊回首記紅橋

雨發宿遷

苦被林鳩喚雨多北風獵獵渡黃河不辭滑路衝泥去
且免驚沙刮面過一騎鮪魚仍入貢十年瓠子尚聞歌
饑荒接壤人方說愁見城南豕涉波

鄭城道中

蹇驢三四驛平野入飛沙白日孤城閉清沂一道斜井

疆邾子國風物魯人家漸與淮南異村村枳棘花

沂州送錢玉友往新城

又作殊方別春衫客泪收但須眠食健莫話短長愁鄉
夢經蠶月人情望麥秋黃雲天四合何處辨青州

伴城旅店次徐子大壁間韻

淺草平陂極望通客程漸入亂山中坐消驛肉全無為
貧檢詩囊幸未空沙磧涼生蕎麥雨茅檐香過棗花風
却愁長日行難到又指斜陽一抹紅

齊河

關城餘霸氣雞犬入齊風
山豁平沙外天低小縣東
魚鹽知俗古豚酒祝年豐
別有雄繁意休誇管晏功

晚抵晏城次壁間韻

目力窮邊酒旆生熟梅天愛偶然
晴高樓吹角風無賴
壞壁留詩客有情紅日忽沈烟
起處白楊長遮雨來聲
萬山回首如屏障一片平蕪接晏城

渡蘆溝橋

草草漁梁枕水邊石湖詩裏想當年誰教梵石通南北

鐵軸銀蹄一例穿

金史章宗明昌元年始建蘆溝石橋

京師中元詞二首

萬柄紅燈裏綠紗亭亭輕蓋受風斜滿城荷葉高錢價
不數中原洗手花

銅盤小拍坐張燈手指城東滿月升從此夜遊涼似水
漸無人賣擔頭冰

憫農詩和朱恒齋比部

幽風本王業稼穡知艱難立政務明農化理自古然我
從田間來疾苦粗能言請陳東南事約略得其端初冬
下菽麥深溝及春前根株載培護益使土力堅麥黃未
及秋晚蠶又催眠祈晴三四月雨水翻連綿針水分稻
秧襪襖行耨田時方仰膏雨杲杲恒當天炎威一熏灼
泥淖同熬煎委身沸湯中辛苦少所便好風槐柳下欲
往不暫間老穉亦靡寧桔槔遠吸川或防霧損花又恐
蟲傷根半年壟畝畔力竭心亦殫如此冀西成食報理

或存但令畝一鍾歲事幸告竣私租入富室公稅輸縣
官所餘尚無幾未足償勤拳况逢水旱加往往多顛連
逃亡等無地芻牧肯見憐高位有仁人垂聽宜惻焉所
以古大臣農事恒惓惓流移進圖繪咨傲陳風愆有時
亟施賑詔旨輒擅專有時撫瘡痍逋賦請悉蠲不上封
禪書不獻羽獵篇乾坤生生機君相捺微權一念苟憫
卹惠風自遐宣矧今

天子聖綏邦必豐年

將有西山之遊次謝方山員外見貽原韻

勞生莽莽笑塵機又向燕臺換袂衣出郭人如秋澹蕩
入山天愛雨霏微閒拖竹杖尋詩瘦賤買村醪覓伴稀
贏得謝家新句好澹忘隨處領清暉

松林寺

含烟含露一梢梢花果禪扉鎖合牢野鳥不知園有禁
隔牆銜出紫蒲桃

晚抵退谷與大司空朱右君先生露坐啜泉

晚色秋光帶遠坳
眼明初喜見涼螢
泱流噴石渾疑雨
老樹交陰合有亭
照影豈能忘盥漱
出山誰復辨清冷
閒僧尚記曾來客
一縷茶烟話酒醒

公不到西山二十八年矣老僧猶能

說舊遊
時事

宿隆教寺僧房

最愛堦墀細雨中
瓦盆高下列芳叢
白花紅子皆秋意
斟酌西窗一夜風

從水盡頭步上五花寺閣

數折溪橋接水源，亂鴉高樹又村前。
路危礧阻千重石，山偏窗開一面天。
佛界偶來宜白晝，帝城難辨是蒼烟。
留詩莫作匆匆去，勝境吾將借榻眠。

臥佛寺

古寺無僧佛倚牆，臥聽蝙蝠掠空廊。
晚來光景尤蕭瑟，葉葉西風戰白楊。

金章宗手植松在壽安山西嶺上

壽安山頭一老松，從下仰視青童童。
羽衣仙人擁蓋立

柄短却作偃僂容我思躡屩苦無伴范老

性華

興到許

我從婆婆初自枝亞入中乃可置一畝宮四傍四枝分
四面側理橫出交蓬鬆東西南北不相顧意到各自成
虬龍中間大枝裹挈領高勢一攬收羣雄其竒峭壁截
牙角直下千尺方藏鋒蒼髯翠尾掉空際蜿蜒飲澗天
投虹千山萬山似搖動鱗甲未斂雲濛濛須臾夕陽轉
西麓脇下叢叢生微風一聲老鶴忽飛出竿籟散入隣
菴鐘老僧指似時代古手植傳自金章宗是時朔南罷

兵革貢使一一舟車通明昌泰和號極治擊毬詐馬習
俗同近郊亭館恣遊宴逐獸不入深榛叢遺山野史有
深意國亡事去忍更攻孤臣飲泣記舊恨肯畏後世譏
不公洗粧樓空春月白射柳圃廢秋花紅一朝故物獨
留此鬱鬱幸自蟠蒼穹爾來四百四十載坐閱桑海如
飄蓬輪困差堪伍社櫟瀟灑猶足驕秦封君不見報國
門前數株樹托根悔落塵埃中

碧雲寺後一山皆內監葬域中有豐碑二通刻

魏忠賢里居官爵甚詳守僧云忠賢自為生壙
本朝初年忠賢門下葬其衣冠於此恨無有力
者培其石也

碧雲臺殿倚雲端香火幡幢屬內官一代賢奸青史定
兩朝黨籍白碑殘松杉暮雨鴉音革羊馬秋風石骨寒
却笑山靈無藉在猶容厠鬼瘞衣冠

冒雨至香山晚宿來青軒

曲磴初從鳥道攀短牆東面抱灣環九重城闕微茫外

一氣風雲吐納間
暝色浮鐘來別寺
秋聲分雨過前山
紅塵那許高千尺
任放層軒擁翠鬟

同吳六皆陳叔毅湯西厓宿摩訶菴

禪榻吹燈睡不成
棲鳥枝上已三更
紙窗一面朦朧月
只道秋聲是雨聲

白鸚鵡次魏環極先生原韻

古有雕籠戒今看
負質竒縞衣窗外
月白雪隴頭枝太
潔從人忌能言被
俗疑商山留羽翼
皓首托風期

原詩有秋

陰高漢漢是爾入林期
之句蓋公歸志已決矣

重陽前六日同翁元音彭椒崑錢玉友朱遠度
吳六皆陳允大叔毅沈客子湯西崖談未菴家

荊州聲山小集分韻

青袍紅燭影相銜
劈紙心情故不凡
柿葉庭空聞朔雁
蘆花水淺夢南帆
探驪有客曾驚座
歸燕無詩亦畏讒
開口勿輕談
世事尊前除飲便須緘

過顧培園編修新寓

不遣輕塵點髮華，斯人直比玉無瑕。
蜘蛛屋角垂垂露，蟋蟀階除艷艷花。
半枕茶烟清畫閣，一窗香篆煖文紗。
從今唱和貪多暇，底用題詩苦憶家。

九日讌朱大司空花莊次韻

漠漠秋蕪一望開，驚心節物帝城隈。
閒招南國騎驢客，來上西風戲馬臺。
人與黃花同白社，鳥隨紅葉下蒼苔。

六年此度天南北

己未在荊州庚申在銅仁辛酉在貴陽壬戌在蕪湖癸亥在西湖

惆

悵名園又舉杯

送六皆歸杭並寄章豈績馮文子嚴定隅二首

風急馳鳴沙外村轉蓬何意復歸根多時白髮思遊子
依舊青衫出國門光範三書原失策渭城一曲最銷魂
買田只合山莊住珍重天涯贈別言

黃葉黃花媚晚晴酒旗茅店一程程稍嫌壓鬢邊沙重
不礙衝寒布被輕夢短賸留他夜話計偕稀上故人名
得歸我亦抽鞭去忍向桑乾聽雁聲

嚴瓊菴侍御招同惠研溪吳天章王咸中王孟

穀朱西峻喬無功陳叔毅湯西崖小集即席分

賦

相逢塵埃中交臂面不熟雅人著懷抱有如瞳在目侍
御鄉國賢未見意久屬司閤戒勿拒徑造少躑躅一月
三過從看到秋殘菊長安多讌會熱客後先續長揖容
吾曹情深感君獨紅豆致蕭淡河東才屈曲石隴光走
珠漢陽璞藏玉髯陳好儀表大喬絕谿谷小朱及瘦湯
秀發秋眉綠廁我數子間傭保坐擊筑淋漓取盡興豪

爽一破俗逃觴或竟去下榻或信宿戲具雜博塞古音
披簡牘狂言醒不禁好句互傳讀坐令布衣交放誕惟
所欲甘從平原遊不學步兵哭吾生莽無涯疲甕信兩
足玉川洛城居并少數間屋未能逃空虛時復累口腹
所嗟才地劣徑路故窄起諸君湖海士相轉適如輻倘
不鄙迂疎前期幸交勗

與研谿別後疊前韻寄之

我從湯子交耳君名已熟初來長安城欲見塵眯目名

園一杯酒邂逅情未屬

余識研溪於趙恒夫農部席上

別時蓮葢紅懷

刺久躑躅忽忽秋向老花期過黃菊晚赴嚴公招名流
趾相續森然授几席後至惟爾獨衆中造膝談稍稍致
欸曲湯言不我欺伊人果如玉似從坡陀遊迤邐入崖
谷松篁幽徑轉照我鬚髮綠石潤斂雲霞泉清作琴筑
對之浮氣盡亟取藥吾俗曲尺移木牀醉留同一宿男
兒屬有才未了三千牘買田歸可種買書行可讀委身
俛仰中初念固不欲况當搖落候有痛忍輕哭涼燈一

穗花夜半開未足浙瀝風洒窗淋浪雨鳴屋明朝門外
路泥淖驢沒腹連鞍共君出寸步苦局趄紛紛疾走兒
馬騁車脫輻卽此慎所之久要互相勗

汪東川宮贊屬題秋林讀書圖時汪給假將歸
似曾依樣買林臯只愛攤書不蓋茅榦老從添鴉點葉
影疎初見鵲成巢好風開卷聲相遞古墨分香手借抄
怪得先生官况懶畫中光景十年拋

送大司寇魏環極先生予告還蔚州二首

曳履星辰二十年尚書襟被故蕭然勇能自斷天難奪
清畏人知世已傳白社竟成娛老地黃金不貯買山錢
閒雲一片秋寥廓何限風光倚杖前

嶽嶽寒松表

御書

寒松堂公臨行時
御書賜額也

新堂歸到好懸車身名似此真

無媿進退何人綽有餘報國文章傳後起

謂無偽
中翰

立朝

風骨想當初不因祖帳東門道太息方煩比二疏

送陸蓬叟之井陘

不道西遊爾許難萬峰高下渡桑乾
亂鴉雪緊荒程暮
叢雁天低斷角寒燕市莫尋當日伴
并州且作故鄉看
到時尺素煩馳寄及與梅花報歲闌

叔毅見示初度述懷詩有感而作

與君世好幼同里其室則邇其人遐
年踰三十未識面
各被衣食驅天涯余顏顛頽變黑瘦
攬鏡未免頻咨嗟
子髯毳毳長一尺瀟洒亦復沾塵沙
燕山此來忽交臂
相視莫逆心靡他衝風冒雨屢相過
朗吟狂咲聲謹譁

行時肩從坐齒序愛比兄弟豈有加一朝顧我歎不樂

刺眼怕看重陽花

叔毅生辰在九月九日

新詩一篇把似我音調

慘裂如秋笳對之思苦難卒讀冰雪入口冷戰牙看君
烟烟具至性母喪未闋衣仍麻泪痕往往在枕席臯魚
岐路憐京華憶余浪跡走絕徼未夏四月初辭家先君
下世纔一載面目赧汗逢人遮平生粗知奉禮教豈敢
自外傷芸瓜至今肝腸抱至痛視息母乃同豚緞歸田
但祈免溝壑此願易給原非奢天於我輩胡獨忍故令

具體蒙疵瑕子今襟期頗澹漠西溪片瓦已可賒塵埃
洞瀕一回首便欲策蹇乘柴車幾時真約結隣去對門
老樹枝槎枒

研溪索題紅豆齋詩冊二首

東田西澗勢相參此本如今恰有三一點丹砂非俗物

居然鼎足占江南

吳中紅豆三本一在拂水山莊一在王奉常東田一在青溪堂即研溪近

居也

薄遊久欠買山資齋笏初安負一枝但使主人長閉戶

樹名何取號相思

題惠研谿崢嶸集次汪蛟門原韻三首

不成吟上紫薇亭翡翠琉璃并作屏
一事比渠差較勝
自編佳句付樵青

紕繆論才本不多詩家勁敵許誰過
不須綽板尊前度
搖膝聽君喚奈何

硯齋吟吻暖生春推爾堯峰步後塵
賴是老元偷格律

知音此外斷無人

每被老元偷格律樂天語也
蛟門舉似研谿故借作轉語

燕臺雜興次學正劉雨峯原韻十首

九關王氣鬱千秋如此風光蕩客愁東路雲垂遼海濶
北條山勒太行收天蟠宮闕瞻螭尾地擁塵沙散馬頭
老柳不禁吹笛意夕陽疎影倚高樓

千古荆丹事最奇誰教秦騎竟橫馳漁陽鼓動天方醉
督亢圖窮悔已遲他日酒徒猶擊筑向來博道抵爭碁
無聊尚有酣歌會不似東方但苦饑

北史流傳樂未央上都幾處闢球場幕南地空聞傳箭

花外樓高見洗粧紫色蛙聲雄八族烏衣馬糞笑諸王
分明裂帛湖邊月及照三朝舉國狂

十三陵古隔巖關往事低推父老顏黃鳥哀歌經國恤
紅巾新籍點朝班金戈運啟驅除會玉匣書留想像間
斫却冬青人盡識稜恩羊虎尚斑斑

直放江湖日夜東異時黨論比狂風清流禍起名賢盡
甘露謀疎國運終一紙興亡看覆鹿千年灰劫付冥鴻
時平翻幸吾生晚不見郊原戰血紅

班馬文從一代編，世家人物數華顛。藏書已獻言何諱，
焚藁無期客問年。莫道汗青從蠹蝕，好憑頭白寫蠶眠。
諸公衮衮皆才彥，珍重須教信史傳。

帳殿崔嵬令閨寥，凱歌連歲奏鈺鏡。雲深雁路朝盤馬，
雪點狐裘夜射鵰。都護玉門關不設，將軍銅柱界重標。
職方別載魚龍國，笑指烽烟薄海銷。

恩波一夕滿江湖，下詔蠲租例久無。忽見黔黎成感涕，
始知草野愛微軀。龍船旗鼓三江戍，馬鞞雲霞五岳圖。

盡道登封儀注古秦松容易比貞符

朱門綈戟列東華金谷筵開辦吐嗟雪甕分漿啣楮
霜刀剪韭妬萌芽歌喉欲斷從絃續舞袖能長聽客誇
贏得狂生無藉在欲捨書籍問東家

百分一棹過觥船何限關河載酒前投筆生涯經絕域
定巢歸計失驚絃縱橫野馬羣飛路跋扈風箏一綫天
曾是征南舊賓客摩挲驛肉也潛然

冬日張園雅集同姜西溟彭椒嵒顧九恒惠研

谿錢玉友魏禹平蔣聿修王孟穀張漢瞻汪寓
昭陳叔毅湯西厓馮文子談震方家荊州聲山

限韻

丈夫置身非廟廊便合食力勤耕桑誰教鹵莽走京洛
去住兩策無一長天公似憐太坎壈一事獨許平生償
招呼朋好作痛飲逸足快脫籠頭韉城南小莊如畫裏
樹頭一扇風旗張忽從空曠入叢薄積雪寒峭屏山倚
籬根涸池受落葉窗面破紙穿斜陽圍爐坐密氣漸煖

稍覺冬律回春光大枰蒸菜芼薑辣滿甕印酒開泥香
蒲萄已充筵上果但見枯蔓牽隣牆初拈險韻鬥傑句
旋徵雅令搜枯腸須臾耳熱更豪劇角逐兩兩爭低昂
傷人却問何所樂我亦自笑狂夫狂三年隻身走萬里
絲路裊裊衝蠻鄉豈無釣藤蠻中酒名拚獨酌意緒冷淡難
禁當翻身勇決作歸計又被饑餓驅遊裝別人騎馬我
徒步鍛羽無分追高翔行藏眼底但如許有意排遣終
悲涼風流見賞古不乏跌蕩慎勿矜辭章明朝定傳好

事口指點此地成驩場安知酒徒積放意不欲與世衡
鋒鏗城頭鴉啼客盡散獨立四顧神蒼茫

與張漢瞻次侯大年韻

竹垞今名家從君賞文格每逢最佳處輒為浮大白自
抱萬卷書羞隨五侯客養親冀一第歲月去已積變體
為時文頻遭按劔斥皇天老眼暗才地每相厄何妨掃
蛾眉稍稍傅粉澤肯違靜者性彼好此不易

送少詹王阮亭先生祭告南海

祝融南都水環滙赤龍渴飲九州外扶桑日枝萬丈高
吞吐晨昏變明晦颶風磨旋鬣帆片蜚雨珠沈蛟室琲
幻呈綵縷現蜃樓淡入蒼烟失鼇背不知靈封畫何境
禹鼎無從辨疆界元和一老去作碑廟貌千秋遂稱最
茫茫元氣收不盡好手何人復堪代康熙甲子

帝東巡特遣軺車告時邁瑯邪先生銜命往嶺嶠星明
指華蓋祠官奉幣紛趨蹌天使陳辭虔跪拜靈旗肅肅
雲蓬蓬一氣流通百神萃向風海鳥聽鐘鼓有眼蠻人

識冠帶時清邊徼無烽燧道遠詞臣多紀載公之文章
在館閣每借名區發雄槩曩時蜀道今海邦盡洩光芒
天不愛後先人物諒無幾才地彼此恒相待所傷或從
遷謫到終恐才鋒束機械如公擁傳真壯遊直放胸期
寫豪快豈徒榮遇際曠典已見風流壓前輩佛桑花發
啼鈎輶幾日歸航下瀧瀨還朝快示紀行篇浩浩洪波
納千派旁人若問陸賈裘徑尺珊瑚手親碎

題田綸霞少叅山薑詩後

得從京國數追隨，真愛山薑一卷詩。
佳處不嫌千遍讀，識君翻恨十年遲。
古人可作心相許，同調無多論稍卑。
便欲借抄煩乞予，手彈紅燭寫烏絲。

小除夜椒崑招同沈韓錫陳叔毅談未菴家聲
山集王巖士樞部齋限韻

蠟燈垂燼夜厭厭，寒薄重裘雪滿簾。
得路才華同輩少

椒崑刻管
瑜集初成畏人心跡擇交嚴，
座中放論歸長悔，醉裏題

詩醒自嫌等是關，山牢落意年年馬齒路傷添。

次椒嵒寒夜書感見示原韻

多生積習未全除，烏有何勞問子虛。
四壁燈明孤影外，一官霜偪二毛初。
也知作客年年慣，若論謀身種種踈。
比似無家還較勝，叩門連夜得兒書。

除夕飲許時菴先生寓齋二首

南衝烟瘴北風沙，每到殘宵輒憶家。
土鏗光陰飛石火，瓦盆消息候梅花。
百觚濁酒澆愁緩，一杵疎鐘警夢賒。
草草行藏十年事，寒鐙影裏又京華。

小閣圍爐薄雪侵坐移宮漏夜方深最憐入座聞吳語
轉遣思鄉動越吟射虎殘年留想像亡羊岐路判升沈
對牀未易論前事倚賴鳴雞激壯心

敬業堂詩集卷五

欽定四庫全書

敬業堂詩集卷六

翰林院編修查慎行撰

假館集上

起乙丑正月盡一年

甲子秋闈被放將出都適黔撫楊公內權少司馬
相留邸舍丙寅冬公以養親告歸臨別檢點詩笈
得若干首蓋從公唱者無過數篇餘皆應詠雜作
分上下兩卷

乙丑元旦立春

忽於此地逢元旦，况復斯晨屬早春。
萬里關河雙眼雪，半年衣袖六街塵。
閉門客少詩初就，老硯冰堅墨未勻。
擬遣家僮擇歸日，歷頭愁換一行新。

人日和朱大司空作

纔到春晴馬意驕，金溝流水玉河橋。
東風吹綠鱗鱗活，倒捲餘寒上柳條。

錢幼鯤將遊江右以詩留別和送一首

西江吾舊到為爾唱驪駒山縣稀逢驛風帆健過湖別
離無善狀貧賤有長途草色春衫外飄零奈酒徒

鳳城新年詞八首

萬歲山前百戲陳內城排日作新春金錢多少纏頭費
半出朝元會裏人

綺羅珠翠極鮮新襦袴誰憐雪裏貧一樣昇平好時節
兩宮春帖進詞臣

杏黃韁配紫貂鞍

天子親祠祈穀壇前隊不教傳警蹕萬人齊傍馬頭看
纔了歌場便賣燈三條五劇一層層東華舊市名空在
靈祐宮前另結棚

雀翎風細遞傳呼三日

君恩有賜酺飛放泊前騎馬入文官班次執金吾

巧裁幡勝試新羅畫綵描金作鬧蛾從此剪刀間一月
閨中針線歲前多

添得樓中幾日忙簇新裙帕紫姑裝一年休咎憑伊卜

拍手齊歌馬糞鄉

繭紙輕敲作鼓聲
銜環絡索鐵錚錚
踏歌連臂同兒戲
何限年光付送迎

花朝前四日朱大司空招遊南莊同田荆巖編
修作

馬首年光柳色新
郊原一棹去尋春
題詩我是重來客
稱意花如舊識人
青嶂捲簾晴帶雪
好風擡袖座除塵
公如早為蒼生出
絲竹陪遊得幾巡

石鵞山莊為王咸中賦即送其南歸

十載才名滿帝都明朝襟被竟歸吳
重穿曲徑尋蒼隴獨上高樓望太湖
放艇有人春載酒打門無吏夜催租
眼前此境殊難得或恐桃源但畫圖

疊舊韻送研谿南歸三首

軟塵堆裏出都亭却指家山入畫屏
算到清明沙路盡一鞭淮岸柳條青

陌上重聽緩緩歌家如傳舍偶經過
一身有母尤應惜

負米終如欲出何

辛苦京華二十春，枉緣篝火勘窮塵。
有才如此吾猶惜，未必天終老是人。

春分前一日再遊南莊

每從遊賞發詩端，草色烟光漸滿欄。
興到不辭連日醉，春分猶剩幾朝寒。
晴邊苑路差宜馬，低處花枝欲礙冠。
二十四番風信在，與公一度一來看。

刑曹關內馬公出知杭州謹呈古體一首

名賢展經綸動與事權會何當量才地肩肩較儕輩明
公蘊蓄竒出手世無對關中昨寇亂豕突掩不戒公時
在鄉閭倉卒發雄槩一呼集義勇指畫定向背登陴氣
勢壯強賊逡巡退守土非無人儒生握成敗上功得州
牧報績果稱最廻翔歷曹郎再使聲華沛蔚州老司寇
許予少置喙推公賢且能謂足壓當代昨來權北關吾
杭扼要害流風揖士子積弊剔駟僮至今蔽蒂棠勿剪
頌遺愛大廷崇吏治一例視中外此郡復煩公托付意

有在府治統九城東南江海匯連山際西北中畫吳越
界繁華昔或然疾苦今百倍婦女力蠶桑丁男勤耜耒
先時辦公稅絲穀長早賣供億苦多門奸胥巧科派弱
同几上肉色有豐年菜况今兵燹餘水旱互痼瘵千里
水陸衝六年轉輸億稍期甦喘息亟望爬瘡疥租從
巡幸蠲圖覬流亡繪公今乘傳出膏雨行當霈兒童騎
竹迎父老扶杖拜賤子本部民饑驅走邊塞歸耕自茲
決直欲從公邁

上巳後二日同楊崇木出彰義門次日抵涿州
馬上口占

放慢遊韉信意行不教馬力困兼程草低天遠盧龍塞
柳暗烟濃涿鹿城遷次心情移客夢蹉跎鄉社負躬耕
杏花開過清明節猶記橫簫聽賣飴

奉陪朱大司空松林看杏花同吳楞香許時菴
王薛澱吳匪菴諸公分韻二首

偶逐肩輿出郭行蹇驢斜照一鞭橫平分節物歸僧舍

背指風沙帶帝城好鳥啼能添野趣晚花開及向春晴
作詩自取排吟興何必留題識姓名

煖烟濃靄互交加樹裏孤亭四面遮杏酪已調初改火
松濤忽瀉正烹茶內官老作茆菴主遠客閒看禁苑花
果園已屬內廷多謝東風不相笑一枝歸壓帽簷斜

鳳阿山房詩為侯大年題冊

畫藁吟多手自芟桐花昨夜夢千巖羽毛大好君應惜
從此歸飛正不凡

送徐毅庵歸梅里

綠槐陰下一條街五度東風感計偕
路盡始知村舍好

調孤肯與俗工諧雲開馬首重經嶽

毅庵歸途將登泰山

絮暖黃

魚恰渡淮想到溪南好風日家人已製筍皮鞋

毅庵不喜著鞋

云故

送祝彥方落第南還

來何草草去匆匆帝里春殘悵別同
歸燕吟成芳草外
跨驢人老落花中
枉綠腰扇遮西日
悔逐烏裘障北風

駱賓王詩烏
表十往還
勸爾一杯須作達
畫眉何取入時工

次德尹見懷原韻二首

倦飛無力出風塵
每對來書輒損神
失路又成三歲別
賣文何補一家貧
浮生泛梗仍孤影
上苑攀花偶故人
多少五陵裘馬地
等閒狼藉路傷春

爛醉旗亭得幾場
鄉愁如海詎勝量
花紅村社巢邊燕
草綠春陂雨後羊
每送歸人因得句
漸消奇氣不成狂
便思短策飄然去
檢點征袍已入霜

送楊耑木歸里兼寄朱日觀錢昭平朱與三王
子穎陳補思寄齋諸同學

悵斷河梁又一回留真無策去徘徊笑能傾國時方妬
曲到知音調始哀別語感君如骨肉故人疑我竟塵埃
相逢為話狂猶昔只是生疎酒伴來

端陽後一日同人集朱竹垞表兄齋分韻

愛君庭戶清絕比似長松夏寒荷柄香含風幔櫻珠紅
吐冰盤閒人不妨鬥酒樂事無如去官同是江湖倦翼

可憐萍聚長安

送郭臯旭歸平湖

屢卜行期又屢愆一官空憶廣文氈飽經世味貪歸路
老傷時名狎少年席帽白堆蓬鬢雪布帆青入柘湖天
倦遊未必非良策萬頃烟波待釣船

畢鐵嵐僉事將督學貴州枉問黔中風土短章
奉答兼以送行

浪遊我昨趨黔境一線乾坤歎蹭蹬辱公就我來問塗

臨別能無片言贈此邦風物口能說筆墨形容反難罄
但從記憶得大凡一一舟車往堪證荒程杳邈六千里
冷暑蒼涼十三郡荒山無樹茅紛披亂水分溪石綿亘
金蠶閃閃夜放蠱苦霧濛濛晝埋窅經過密箐偶逢人
雙眼睚眦語難聽裏頭黑獬擅覆膝赤脚花苗裙及脛
呼同山鳥似有名籍隸官司總無姓其中一二稍秀拔
畧解詩書誦賢聖憑將流寓較土著有似蓬麻草中勁
卅年况復兩邁亂子子殘黎偶然剩此時收斂加冠巾

亟賴名賢計安定先生制藝傳海內帖括家家奉龜鏡

昨年選曹得兩浙私為鄉人喜稱慶

公赴銓選初除浙江學使已而改授

朝廷有意變成格使者移官膺

後命勿輕荒徼愁遠宦此去依然執文柄五丁力在山

為開尚闢蠶叢作蹊徑苗民雖頑亦人類向化何嘗絕

天性從來教養視人事豈謂聲呼無響應幕中浦郎

功傳

况才士唱和溪山好乘興公聞此語當鞦然快束行裝

倚鞭鏡

送葛受箕赴建陽丞

南行風土近鄉關
路轉三衢第幾灣
簿領老除新佐貳
幔亭天與好溪山
松間日影哦詩過
花下文書判尾還
葛工楷書如此襟期原不俗
宦途有味是蕭閒

喜外舅陸射山先生至都
六月望後為先生初
度同學數子置酒容園為壽
敬賦長句四首以
侑觴

幾遍芒鞋踏帝畿
星埃頭上片雲飛
漸除豪氣終違俗

纔卸行裝便憶歸晚節尚餘文筆在舊遊併覺酒人稀
清時肯擅徵君目收取聲名待拂衣

夜夜星明處士天青山高臥奈無緣癸辛志每隨行笈
甲子詩多入紀年未定草堂天寶後就荒松徑義熙前

身為甫里先生裔莫笑貧無一稜田

陸魯望詩我本
曾無一稜田

小別回頭又隔年重瞻鬚髮轉蒼然採芝園綺今無伴
善飯江湖老亦仙簾閣日長棋算劫荷陰人去鶴看船
過從最憶須雲閣老樹濃陰庇亂蟬

尊酒名園借榻餘
眼中泉石自清腴
同來我亦辭巢燕
暫止人猶愛屋烏
新沐頭輕從髮禿
穿花步穩倩藜扶
尚平此日差無累
懷袖親攜五岳圖

送李蒙山回嘉禾任次外舅韻二首

敏弦歌罷水風涼
碧野秋遲未剪霜
報道今年官酒賤
公畦小稜秫花香

衣裘容易改寒暄
來往無端閱使軒
歸夢隨君到蘋末
白鷗飛處是田園

苦雨次少司馬楊以齋先生原韻二首

連旬暑雨不曾休
邸舍焚香兀自愁
猶勝萬重烟瘴裏
五年三伏滯炎州

剝啄聲稀退食堂
生衣十日透新涼
間中筆墨能添潤
一桁簾波潑硯光

柬朱竹垞表兄時移居古藤書屋

整妮牙籤萬卷餘
誰言家具少千車
僦居會向春明宅
好借君家善本書

宋次道居春明坊家多藏書皆校三五編推為善本士大夫喜讀書者多

居其側以便借抄當時春明
宅子比他處儼直常高一倍

酬別鄭寒村

關風伏雨兼旬臥晴路一鈞新月破簾前暑退得新涼
門外泥深成埒坳此時有客過言別蹩蹩毛驢壓歸馱
囊空隣酒賒不來醒眼相看但愁坐一篇削藁辱佳序

寒村臨行為余
序慎旃二集

七字留詩慙屬和余才弁陋非爾敵強

以珠璣承咳唾甬東同學屈指論往往傳經接師座

余與

寒村俱出黃門故人再與瀛洲選

謂介眉滄
柱兩太史

一鄭滎陽尚摧挫

失羣行李獨淹泊有價文章久傳播燕山此度六往來
未免征衫被塵浣干時少術非爾病當路無援是誰過
向來人盡棄所長遠到君能見其大古人可作迺殊代
同調相求凡幾箇勿將時命較窮通只許才名出寒餓
羨君有志成果決笑我無端逐游惰偶逢知己私自嘆
每送歸人輒相賀荆榛滿地羊觸藩日月周天蟻旋磨
故鄉樂事殊可憶欲往從之正無那秋風一騎不可留
八月江田熟香粳

范性華徵君屬題陳憐小影

小像沉香手自熏前期如夢却疑真五湖忍負閒風月
為少扁舟共載人

送聲山姪之湖口二首

自憐萍梗尚京華勸爾江湖飯好加南北豈堪頻送別
去留等是未還家遠書到眼秋垂泪

時聞翰荒兄
長沙訃信

隻影

挑燈夜落花如許流光真痛惜校量何計穩生涯

萬頃波心坐白鷗一天涼雨到扁舟三年廬阜虛前約

往在南昌與聲山相約入匡廬度歲不果
兩度潯陽感舊遊
帆葉依依重入夢
蘆花瑟瑟正交秋
青衫尚洒琵琶泣
那得平銷我輩愁

墮馬歌為朱悔人賦用李茶陵集中韻

朱髯別家久不歸
如鳥羽倦猶孤飛
踵決曾穿雪中履
綫綻未補秋來衣
長安城中多第宅
年少翩翩好裙屐
青絲絡馬裝馬鞍
騎出從誇新買得
髯乎足不出戶庭
塵高十丈看橫行
忽然欲詣良友酌
正坐倚壁空餅饜

蹇驢力小不任重性命敢謂男兒輕牽來未識北馬性
借得大感東家情掀髯却上跨韉坐掣電流星一鞭過
此時逸足縱莫收造父旁觀巧難佐跣跣駕馭良匪易
馬上人從馬前墮鏡中欲博齟齬笑賦裏偏憎插花賀
康莊大道城西河失足何必皆坡陀有生所事非意料
未許輕薄相嘲訶當年頗怪王處仲曾為伏櫪生悲歌
虎頭失計始投筆猿臂何物誇橫戈不如漢陰歸閉戶
安穩生涯信徒步未成矯矯鶴南飛那免犛犛兔西顧

夕陽牛背輸牧豎夜雨蘆中負漁父故人乘車爾戴笠
此作參軍彼主簿天生爾以不羈才困躓風塵是誰誤
眼前只作墮馬看一跌無端豈終仆叩須肯赴舟子招
將伯誰為輔車助我生鹵莽事奔走屈指嶮崎經畏路
尚逐他人肥馬塵浪遊此出凡三度似聞樊圃限狂夫
便合因君警晨暮

上少司成徐蘋村先生二首

數仞宮墻入望新鼓鐘相應在成均何期當路心猶折

如此憐才意始真魚鬣欲騰燒後尾琴材偏賞爨餘薪
百川東下何須問賴有狂瀾手障人

韓愈猶居博士員風流此外孰隨肩來參講幄三千士
及聽聲華四十年樂地不踰名教外人才都定笑談前
讀書射獵論初志直為從公願執鞭

送周雪客赴太原藩幕兼訊安邑丞陳六謙

半年裙屐軟紅塵旅橐多緣好事貧手板老方除佐領
幕僚古亦屈才人巖關夜度荒雞月絕塞秋高一雁賓

投轄舊遊豪氣在莫將俗吏視陳遵

題張漢瞻望雲圖兼送其歸粵城

風流取相賞至性關感動我交天下賢孝友得張仲學
成家轉貧母在身愈重長因負米出屢缺晨昏奉天如
憐斯人不忍付寒凍但令邀一第薄少分半俸逋尾戀
慈烏竒毛刷雛鳳中情稍自慰白髮免尸糞如何舉子
場久抑禮部貢賣文給衣食頰首逐儕衆三年長安城
側足塵瀕洞布衣慈母綫風裂秋來縫坐遣望雲心時

時結飛夢誰從筆墨下寫此肝腸痛披圖見君意我乃
有餘恫平生蓼莪詩廢置忍再誦菽水不逮親偷生復
奚用君今及歸養此樂世罕共板輿隨春遊金經侍晨
諷好與劖雲根靈護手親種

送汪寓昭南歸

國家制科設取士數亦夥苟非得其人臚仕真瑣瑣子
來試南宮命中弦激竒千言屬廷對一一明珠顆謂宜
遂騰上帽壓宮花朶羣飛或刺天而子足猶裹束書欲

南下躑躅每未果草草薄遊裝昏昏短檠火半年仍旅
食今始買歸舸一涉仕宦途古人比韉鎖子方富年力
抱負况磊砢更讀十年書識老才亦頗井然見經濟歷
試靡不可得第未得官於遇非軾軻子如歎失意何地
更處我

送何雪神宰溧陽

嶺表才名久軾倫一官江界去逡巡五千里外飛鳧地
三十年來謁選人可有孟郊為縣尉長容閔貢作州民

謂宋
梅知
鳴琴以外無公事花氣能銷簿領塵

周廣庵編修席上分賦秋蘆十六韻

秋入江湖濶天連葭蕩荒懷人方渺渺極目但蒼蒼搖
落空洲畔參差枉渚傍拂莖看漸老抽笋記初長露壓
稍稍重聲添葉葉涼戰風迴折戟溜雨得沈槍寒水依
痕靜殘暉弄影忙白疑先挾雪青愛乍經霜暗浦菰交
暝沙田稻映黃就橋迷蟹籩引路入漁莊錯莫招窮士
延緣阻一方寒蟬遺晚蛻遠雁落斜行感篋悲辭漢琵琶

琶怨嫁商托根隨地有薄植過時傷織箔思蠶事編簾
隔草堂刺船如有約吾興在滄浪

秋夜集古藤書屋時梁藥亭將歸南海聯句送

行

此首亦刻
曝書亭集

露葉倦未飄雲鴻遠相引

朱竹垞

星埃感蓬勃物候變淒

緊

湯西厓

惓惓八達遠有客發修軫

悔餘

僕夫在郊垆

黍被隰吟

梁藥亭

柁車浮淪瀾舍榷度嶷嶙

朱

雷殷風息

颶海大魚見鱉

湯

峽猿有時歸南雪終不賈

查

八九月

之交六千里而近梁懷居興雖洽判袂情詎忍朱置酒

青藤陰入門走蛇蚓湯颼颼涼颼動灑灑纖月隱查山

杯深窪匏野菽脆嚼茵梁迎寒笳卷葉戒夜鼓鳴奠朱

談鋒騁趨雄詩械破室窘湯毫毛秋穎脫墨光古香吮

查臨當黥然別且復莞爾哂梁炎瘴固所便眠食勗惟

謹朱行看早梅墊到及蟄蟲蠢湯前期久勿忘鄉夢今

迺準查穆如清風篇持以示均尹梁

再送梁藥亭次大治司農原韻

草低天遠見牛羊九月燕山早得霜去國一樽秋惜別
入時雙黛老羞長飛鴻與作書空字落葉輕如度嶺裝
一物差堪銷客况難拋鄉味是賓郎

王黃湄給諫屬題紅袖烏絲圖二首

十級丹梯百媚城小欄高下得芳情美人一笑花齊放
為報毫端鍊句成

橫幅看題幼婦辭箇中多識背時宜只除一事曾瞞却
諫草焚來不遣知

重陽後一日長椿寺譙集聯句

此首已刻曝書亭集今附錄

九日倏已過

姜西溟

濕雲漫四郊森森長雨垂

朱竹垞

颯颯

虛檐捎病葉戀冷枝

梁藥亭

驚鳥盤空巢晨興踐夙約

陸射

山攬袂皆貧交勝引雙樹林

魏禹平

宛若深山均藤綰三

秋蛇

張漢瞻

槐舞千歲蛟楨柿迸露實

朱悔人

金英圻霜苞

紅的的吳萸

陳叔毅

碧茸茸秦瓦溝窺鼯鼯

湯西厓

戶網

牽蟪蛸蘚深蟲屬伏

查悔餘

篆古蒲牢哮粥魚畫浩浩

俞大

文墻雞午膠膠光景歛明晦

姜

眺覽窮櫓櫟新耐綠滿

竿

朱

晚菘黃充庖豈意青豆房

梁

俄頃羅嘉肴鳴薑膾

紫蟹

陸

題糕餘彩貓子鵝新韭配

魏

鮮鯽枯荷包已見

雉膏登

張

况有兔首魚分曹玉鈞射

朱

角力毆盤拋急

觴易沈頓

陳

緩帶便爬抓一飲動一石

湯

載號或載叟

同聲唱者和

查

含意漆在膠五言乍安貼

俞

十手爭傳

鈔雖乏韶濩音

姜

肯使下里穀合并洵匪易

朱

顧我中

心忸歸帆艤舫

梁

別騎籠鞅鞞邏陟荒岡

陸

邪許

擗長筴免泣下和璞

魏

且誅宋玉茅中縛不借履

張

泉

酌吟然匏檳榔蕉椰荔

朱

都蔗菱菰菱雞頭祖竹萌

陳

翠羽官梅稍熟知江鄉樂

湯

莫厭潮田曉招隱丘中琴

查

勵志貴上交豈必馬足塵

俞

逐逐營斗筭

姜

送侯大年歸粵城

惠子春深跨白驢

惠元龍歸吳

季鷹秋晚憶尊鱸

張漢臆歸嘉定

窮

歸甌粵吟詩客

高雲客還闕

老奉龍舒養母圖

方田伯返桐城

過闕

梁鴻仍感噫

梁藥亭歸嶺外

多才王勃尚江湖

王孟穀自楚入滇

君今

又掛南帆去寂莫黃公舊酒壚

顧培園宮贊寓齋燈下賞菊探韻限為字

劈牋重和去秋詩葉底花前榻未移却對清尊驚候晚
尚留名種愛開遲閒情特許攜燈就畫稿猶煩蘸筆為
莫話陶家三徑事年年此景負東籬

劉雨峯兼隱齋小集

四門稱博士五載住京華客醉新支俸庭開手種花塵
埃何處著書帙逐年加不道成兼隱官清只似家

禹平南歸詩以志別

辛苦論交地追歡得幾回却忘吾久滯翻望爾重來才
恐隨年退眉還仗酒開知音真有數流俗任相猜

燕臺歲寒雅集同王后張錢越江顧九恒彭椒
崑吳萬子孫愷似王崑繩錢玉友徐子貞高遠
修孫子未王巖士陳叔毅湯西厓談未菴馮文
子俞大文家荊州作二首

一天殘雪冷晴暉高會金臺近已稀我輩論交終落落
他鄉對酒倍依依蒼茫敢信前期在輕薄翻疑古道非

得路何人能折節向來同學儘輕肥

檐花檐雨夜沈沈猶憶年時載酒尋忽漫回頭成昨夢
每從失路檢初心殘碁吳越尊前壘短褐冰霜歲晚吟
同調尚留公等在敢憑餘子說知音

偶過史胄司編修齋賦贈

每從朝退得閒情深巷稀傳剝啄聲視草才矜編集富
簪花格愛學書成茁來玉樹枝枝秀賞到冰壺事事清
怪得官清能下士五年前是一諸生

敬業堂詩集卷六

欽定四庫全書

敬業堂詩集卷七

翰林院編修查慎行撰

假館集下

起丙寅正月
盡十月

寄題宋漫堂觀察園亭六絕句

村烟雨外青沙草
岬頭碧欲知春淺
深風到鱗鱗活

綠波村

菱角初翻刺雞頭
未剝圓涼風吹酒
醒人上過溪船

芟梁

春水綠于頭春花紅似掌漸次去人遙鳧鷖雜三兩

放鴨亭

團瓢不鬻茅擁蓋松陰下茶熟正吟詩風濤入懷瀉

和松菴

魚蓬閣淺灘閒却絲綸手長被酒家翁紅腮偷貫柳

釣家

白鳥點蒼葭沿流畧釣斜愛他丞相第簾箔似村家

即文

康公舊
居也

緯蕭草堂

送顧九恒南歸

柳汁春回翠滴衣羽毛雖好奈孤飛行期屢改今才決
同調無多去轉稀換眼舊遊隨夢散掃眉新樣入宮非
杏園已是攀花客終勝初程下第歸

俞大文出都同人祖席分韻得郎字

客中送客春茫茫投牀夜夢得故鄉

前五日九
恒別去

旬來怕

聽叩門別君又結束匆匆衰出都贈行例有句况我與
子情難忘我時正坐作詩瘦不耐冷淡搜枯腸典衣且
復就劇飲醉後亂發如風狂憶君年當十五六談笑目
已無盧王曾蒙佳什盛許予駘駘質下非敢當

辛亥秋
大文賦

駿馬篇
見贈

厚意寧能久不報積逋耿耿今粗償識君最早

莫如我只恨岐路趨殊方萍踪一散十三載兩曜轉轂
驅星霜班荆故國再相見孝廉船繫禾城傍才人生還

話絕域詞客遠別歌河梁

以上叙癸亥春與大文搗誦
同集吳漢槎鴛湖寓樓事

片帆湖口浪滾滾匹馬薊北水碾碾竭來酒市並僦舍

我極潦倒君飛揚故人聯翩貢禮部屈指仇

滄柱

顧九恒

徐子貞

陳廣陵

汪寓昭

君於其間最年少爭看白面俞

家郎風擡袍袖綠陰合花壓帽影紅綾香文章自足取
高第仕宦何必皆巖廊苟觀愛才或太息達士安命無
摧傷

鑿輿昨者東幸魯曠典百代傳輝煌君今應聘往纂述
豈異扈蹕來登堂直從國書採鉅麗不比家乘搜散亡

誰云小試著作手會見奎壁垂天章

時大文應行聖公聘纂修幸魯盛典

偶然便道一返里山青雲白遙相望眼前合并那易得
歸興未抵離愁長鞭鞘已出軟塵外裊裊絲路穿垂楊

移居詩為姜西溟作

自我來都城三見君移居前年街東住夕陽到庭除殘冬
徙巷南北戶風攪裾今臨大街西朝日明窗疏短生寄長
世天地猶蘧廬矧乃一榻安韓韓良有餘君才本絕代應
召來公車姓名上史館著作登石渠太倉五升米既飽

同驪娛漆光拭修髯外澤中不枯有時典裘褐問架如
期輸卷軸不用籤錯置圖與書偶從移居候整妮驅蟬
魚經旬復成堆零亂巾箱厨即此見真率寧能事奔趨
朱門曠蕩開無地置爾軀請看名山業終古歸繩樞

王忍亭主事招遊相國宛平公怡園二首

沙路開三徑名園甲九州不緣君愛士那得客同遊好
鳥來宮樹春水落御溝野人雙眼豁初見

賜書樓

見說門前路鳴騶日
日來簇燈春宴罷
踏鼓早朝回
華萼居相望
平泉第對開
從來論相業
原不廢亭臺

上大司成翁鐵菴先生

虞山龍蜿蜒
昂首挹海若
滙為人文藪
嬗興代有作
我公實名家
問世出騰躍
却將波瀾勢
捲起向寥廓
國家取士途
帖括制仍昨
後生奉師程
體裁就拘縛
蠶叢岬負固
斤斧孰開鑿
巨手得韓歐
呀然啟鐫鑰
文昌一星曜
餘若螢火爝
以此結

主知廻翔上館閣十年執文枋出入兩不作東郡昔掄
材雲羅恣搜索遂令齊魯風一變起積弱至今劔光在
識者辨干莫文運際中天四方視太學頗聞長老語斯
地久寂寞簏篋器空懸豆籩禮猶託春秋刳羊豕朔望
奠箏爵四門官俸輕六館廩餼削惟留古時栢枝榦尚
盤礴花甌饑啄鷹鬥拱暮巢雀庭荒狐狸窟人去蝙蝠
掠壁書畫摧殘獵碣字剝落偏傷按點黠星隕不可攬
自從

萬乘臨廟貌再丹雘臯比位祭酒此座不輕著新城轉
官去士氣孰聯絡公來一震聳造就指不各外貌謙以
和中懷嚴且恪從公日于邁人有執經樂園橋看濟濟
在泮咏躑躑方當發賁鏞豈獨警通鐸三千萃絃誦餘
地故綽綽移時具規撫次第布條約經術植本根史書
覽大略詞章及文藝餘事柎承莠必若計栽培先須破
根格力圖古制復事異虛名博煦若春達萌釋如秋解
籜時情重成例清議動多格憐才出至性此意感非薄

賤子望塵來三年客京洛門墻雖濫廁鞭策稍知懼公
干汲引塗取予必斟酌何期納百谷亦復收一勺傾儔
方自茲惟公鑒葵藿

清明日同玉友荊州出右安門就旗亭買醉晚
至朱大司空花莊復留劇飲即事四首

新烟淡柳梳梳雨洗輕塵出郭初遠客不知京國好
酒旗風裏話田廬

三鷗岐路小車歸一曲花遊簇作圍春色盡隨紅艷隊

明朝蛺蝶滿城飛

聯鞍緩鞚去逡巡
覓句沈吟苦鬥新
忽漫詩成狂拍手
墮鞭驚起馬頭塵

典衣偶出為尋春
重向名園叙主賓
慙愧公卿傳好事
一時狂號屬三人

摩訶菴看杏花次司空公原韻

壺盧酒熟鳥催提
路轉松迴別有蹊
艷入繁枝停畫鼓
淡教微雨洗花泥
開遲翻悔來看早
興好方嫌飲量低

却被閒僧嗤好事一雙蠟屐舊曾攜

三月三日朱大司空招集南莊限三字

一旬雨雪春淹淹餘寒尚殫三月三滿城花信近桃李
客舍冷落思江南司空園亭傍水際初已有約來停驂
郊原霽色忽入眼豁若明鏡初開函草凝露光翠撲撲
柳挾風勢青穆穆檐牙燕巢看新補枝亞雀覷俛可探
蘭亭勝事俗久廢京洛良會情尤耽輓轡轉水百尺底
繞砌曲折歸澄潭不須絲竹發豪興自有風雅供清談

銅壺靜傳竹箭響蠻榼遠費桃枝擔先生名高暫解組

公子官好能抽簪閒從門生

諸公皆先生門下士

奉几杖猶許野

服來相叅古道力持公自厚羣賢不鄙余懷慙久留帝鄉亦何為土俗節次差能諳放鐘撇卯等兒戲歲月過隙真奚堪大杯一澆壘塊散得飲且復拚沈酣前期更有聽鶯約預辦斗酒攜雙柑

喬石林侍讀一峰草堂看花同外舅陸先生朱

十表兄錢越江周青士孫愷似湯西厓分韻

愛花成癖不待招春來徧踏東西郊起聞啼鳩送春去
猶跨短鐙搖吟鞞斜街草堂地清絕瘦藤當戶挈老蛟
土墻面面紅窄堵沙徑曲曲青盤坳磬頭暗皺高下石
亭子乍翦離披茅巧從陰借桃李杏惜少水養菰蘆艾
棠梨素粧太淺澹繁蕊亂拆丁香苞新開海棠好顏色
兩樹氣壓千花梢主人為言初買得舊根帶土枯蒲包
擔頭親為解其縛位置特許依書巢栽培本關造物意
人事未盡休輕嘲蚪泉口嘗手自灌及見紅艷青葱交

他人買園身不到君乃僦屋情難拋花時連日得休沐
剝啄有客門頻敲行攜几榻隨分設野蔌蒸薺樽窪匏
偶然興到觸佳句已被萬手爭傳抄我詩不工強屬和
出語毋乃同號叟不成甘受金谷罰忍負新月垂弓弰
是夕再飲嚴粦菴侍御鸞枝花下三首

賣花聲裏過斜街不記招尋月幾回只有繡衣真愛客
印泥封酒必同開

僦居喜近慈仁寺移得鸞枝隔歲栽報道退朝今日早

東欄昨夜有花開

矇矓眼纈隔窗紗曾入東隣學士家
一醉竟須煩二主
可憐頻對客邊花

送叔毅南歸即次留別原韻三首

到處誰當却掃迎去留此際計非輕
自收詩上還山集
何取人傳入洛名三世羨君猶共爨
百年為客總勞生
豈應陳孺長貧賤如許鬚眉徹骨清

竭來挾瑟並燕中廡下猶欣傷伯通

謂獲菴

儘有狂言容

數子每從高會厠諸公淋漓醉射東方覆蹀躞羣看北

野空恰恰酒人從此散一天無賴柳綿風

九恒大文未
菴西厓俱先

後出

都

敝廬好在龍山下藤蔓花梢一一垂春草池塘空入夢

德尹復

遊嶺外瀧岡窀穸杳無期封書病檢山妻藥陳筴慵探

季子錐百念因君多撥觸最愁人是望鄉時

重過摩訶菴老僧以新茶見餉

細色網從馬上催筠籠先為老僧開髻絲禪榻前因在

直愛茶烟又一來

慈壽寺

摩訶菴西慈壽寺老樹盤礴爭竒雄當門古塔少梯級
合沓直上烟霄空廻廊二千五百步一一畫壁堆青紅
仙山鬼府靡不有搜神志怪殊未工雲旗飄飄翳白日
闕殿肅肅來陰風不知茲寺創何代負墻古佛塵相蒙
居僧兩三乞食去好事欲問嗟無從手揩雙眼看碑碣
歲月却記明神宗是時海內際清晏嗣皇冕藻年方冲

雞鳴問寢駐銅輦瑞蓮獻賦歸新宮

萬曆初年瑞蓮產慈寧新宮閣臣中

時行王錫爵俱作賦

一朝家法古無匹聖母不在垂簾中偶營紕

宇祝萬壽未可概議物力窮百餘年來就頽廢鐘鼓尚

與隣菴通君不見內官葬域抱山麓異時祠廟還穹窿

夜宿養素堂東偏

裊裊一枝藤疎疎幾行柳籬落吐燈光鄰家猶賣酒

秘魔崖古栢長二尺許俗傳隋仁壽中盧師手植

連岡東北轉鬼物托幽秘瞰空飛一片石縫舒右臂老

鴉銜栢子偶向駢拇墜飛泉難仰流長此攀拳翠相傳
閱千載僅可二尺計勒龕誇佛力此語吾所鄙猥蒙雨
露恩竟負栽培意兒童斤斧脫大匠棟梁棄寧非干霄
姿吁嗟守憔悴

從磨石口至翠雲庵

亂山中有崎嶇路時聽征車撼石聲行過翠雲塵乍少
馬頭麥浪綠初成

立夏前一夕大雷雨宿西山麓

臥聞風雨聲惜此花間路沙路不成泥披披曉窗霧猶
嫌入山淺未到雲生處

日涉園送春

驚雷掣電夜窗明忽轉雲頭又放晴夢裏似曾聽雨過
曉來不礙看山行紅衣匝地枝枝瘦翠幄支天葉葉清
遊興有餘春向盡暫時經眼倍關情

早發杏子口暮至香山

西山灣環勢向東兩角到地形垂弓客從山南走山北

耳畔箭激颼颼風迢遙一程晚始達喘汗未定馬力窮
入門翻愁磴曲折落澗已愛泉琤琤居僧指點最高頂
十里近與前岡通冥冥一綫縈萬丈蜀鳥飛去啼春紅
人間何處無捷徑失足怕落荆榛叢吾寧迂遲就坦道
肯試竒險爭樵童殿西一軒得空曠雲根倒插下積空
夕陽將墜尚未墜數峰晴意憑欄中回頭却望來處路
已被遠樹遮溟濛

再宿來青軒

景物蒼茫感舊秋

甲子曾宿此軒

還將筋力試重遊行穿下下

高高路題徧山山寺寺樓捲幔微風香忽到瞰牀新月

雨初收洗空塵土三年夢一夜鳴泉傍枕流

山下有泉名甘露

永安寺頻婆花下

啼鳩聲中日向斜閉門春盡似村家黃蜂飛過短牆去
零落頻婆兩樹花

從洪光寺下十八盤取道而歸

洪光我昨到石徑盤曉蘊不知眼界寬但覺足力費茲

遊及晴爽勝境天所乞

去聲

泠泠松上風倒酒泉泌沸路

窮寺門出氣象非昔謂關河劃然分有若列涇渭平疇

碁布罽萬象經錯緯舊遊領新得噉蔗飫餘味重尋周

歷處畫像儼中貴

寺為正統朝太監鄭同所建按碑記約費七十萬

輝輝金碧

光尚壓一山氣峰高此為最興盡我猶未何當躡其巔

西覽韓趙魏

酬陳子文安邑見懷之作

新詩讀罷一摧顏何恨心期悵望間塞柳關榆遮不斷

數峰春雪太行山

白芍藥和孔心一少參二首

扶頭一笑粉生光
鏡裏匆匆看改粧
金餅賺來初罷浴
瑤階行過但聞香
含嬌似爾情難禁
太潔從人忌不妨
莫向中書誇故事
素心羞對紫薇郎

便從姑射擬肌膚
那許餘容伴鼠姑
美酒對傾金盞落
佳名果稱玉盤盃
鶴翎舞拂新時樣
獺髓痕消舊日圖
珍重一襟冰雪意
殘紅掃地近來無

送湯西厓南歸兼寄嚴定隅

古寺槐交陰微陽轉水簾

上聲

與君初握手片語示肝膽

來當傾蓋新久覺忘形漸相過日不隔懷抱兩無忝狂
言我難緘嬾病子未減彌縫補其闕瑕類肯互掩子才
隨地湧百斛走激艷屈首舉子場十年困習坎隻身泝
瀟相盛氣生勇敢歸來翻一笑函匣劍光閃未免為時
名束身就繩檢酒徒遇燕市搖落自多感兒曹太輕薄
載鬼白日魘榆槍斤鷄如冠著沐猴儼彼頑何足校我

白故無玷稍恨素心人
晨星散疎點金溝送別處屢見
風柳颭子來辭我行忽若猿出檻
足矜行卷富何礙歸
褻儉溪堂行補苴湖舫待剗剗
開籬受竹色擇石置崖
广青艾鴨脚葵白剗鵠頭
芡隣沽貫新熟詩韻鬥竒險
此樂吾久疎歲月徒荏苒
雨堂倘問訊應惜緇塵染

閏夏飲竹垞表兄古藤書屋限藤檉二字各成

五律二首

曲巷居相近迴欄到每憑
爽開尋丈地陰合兩邊藤
幽

事披襟愜新詩計卷增

時竹垞騰笑集初成

醉探杯底綠涼影落

層層

碧草柔牽蔓紅花細著檉客稀成雅集屋老稱佳名
滄雲催暮疎疎雨放晴家園風景似只是少啼鶯

雨後龔蘅圃攜酒古藤書屋分韻得能字

結隣君最好苟舍綠陰增榻愛同時設門教一僕應異
書便借看新句急催徵許我時相就衝泥到亦能

曲阜顏母朱太夫人壽讌詩修來吏部屬賦四

首

玉女峰連泰岱青人傳翁主是前星朱門昨夢滄桑變
白首餘年患難經禴翟恩曾邀北闕扶搖風又徙南溟
勿論陋巷家聲在母德還堪作典刑

郝鍾禮法尚嫌疎比較門風正不如壽母有詩存魯頌
世家無例闕班書五雲扇底分儀仗八座花前侍起居
慙愧潘輿輕作賦金根還有嫁時車

唐德宗朝趙國公
主下嫁始用金根

車

霞帔重加舊日冠
慈顏一笑一加餐
從看舞袖迎花詔
猶記傳經傍杏壇
吏部文章今卓卓
翰林風骨久珊珊
謂淡菴
太史
同時丹穴雛皆秀
世澤方知擬似難

水天間話屬葭草
異數曾聞拜舅姑
娣姪紛紛齊庶士
門墻一一魯諸儒
王姬老去樓仍鳳
顏氏歸來巷有烏
不為尋常誇燕喜
八千親寫壽護圖

飛蝗行和少司馬楊公

去冬臘雪不蓋土
今歲天行旱畿輔
門前有客來故鄉

為言千里皆飛蝗綠陂青野一時失但見黃雲蔽白日
我聞此語方長歎愁坐不知天宇寬有聲藪藪自南至
驟聽乍疑風雨勢舉頭杲杲燒火輪中庭過影何紛繽
蜻蜓蚱蜢亦羣舞倏度宮城齊振羽宮城十丈高巍巍
誰能禁爾漫天飛

武陵楊長蒼重來都下感舊有贈

建業相逢記一樽飛蓬心跡感重論舊家春燕烏衣巷
故國秋瓜覆盜門愁倚白頭絲減髻間繡青史泪交痕

可堪潦倒風塵際還見元和一品孫

送孫少司空督濬下河

神京建西北歲走東南漕去聲轉粟上青天黃河扼其要

元時用海運年久有成效此議今難行將毋物力耗宣

房十年築宵旰煩

廊廟千村收竹槩十郡供柳埽百萬糜金錢一支歸故

道吾

君如唐堯勲德在覆幬百神胥受職河伯敢陵暴猶復

念民勞南巡趾親到下流得地勢海口計疏導紛紛異
同論破例寧意料學士居禁林十年不輕調汝往作朕
虞欽哉奉

明詔歲輸發內帑恩澤蒙再造畚鍤興如雲邪許相慰
勞和衷事斯集正氣神可召芄芄黍苗歌可乏陰雨膏
渠成萬世利績待暮年報

送楊筠湄通叅赴任奉天

國家都燕京遼左本根倚東西營鎬洛周制正如此城

闕遙相望關隘紛可指設官重保障未可猛政理阡陌
屯田開戶口豪右徙卅年盡土著烟火變墟里仁人來
撫循爾輩皆赤子

呈少宰董黈菴先生二首

丹霄地望絕攀躋尺五城南萬仞梯日月文章韓吏部
天人經術董膠西都無半刺通干謁却媿凡才出品題
此日黃金臺畔路不聞伏櫪盡長嘶

注籍紛紛屬貫魚積薪時論近何如尚煩啟事從容入

及見銓曹次第疏閣下銜仍兼學士殿頭班欲領尚書
文章得路如公少還恐為儒計或疎

吳門徐彥通來都得惠研溪近問疊紅豆冊舊

韻答之三首

勞勞別夢短長亭兩度秋風冷畫屏忽聽故人傳尺素
夜長添對一燈青

庾彥愁聽室人歌拚却長程歲月過我已鬢毛秋換綠
不知君髮更如何

名園婪尾醉燒春豪氣曾陪末座塵此日青衫尚留滯
蹇驢腰扇怕逢人

次馮文子南歸留別韻

高視沆寥天俛瞰廣莫野斂才就實地始信得力寡文
章技尚卑矧乃論騷雅方期木雞養不礙伏虎啞讀書
滕口說正坐氣難下築臺逃文債支戶辭吟社靜觀得
妙理擾擾何為者因君又多言餘習吾未舍

當湖王復園索贈次沈繹堂先生原韻即送其

歸

寂寞名山業蹉跎始自憐
長途添白髮老眼望青天
夜雨新豐市秋風下漢田
夢中歸路近帆卸郭東船

與顧梁汾舍人次閣學韓公韻

不是微之定牧之紫薇亭擅舍人辭
十年未就歸田賦
衆口猶傳赴洛詩
往事相關碁已散
秋風纔到鬢先知

怪來東閣留賓地難遣深情是酒卮

時舍人有亡友之痛

九日飲朱大司空南莊二首

雲物蒼涼感鳳城良辰難遇是晴明同時那得人偕集

是日西溟筆集萬柳堂余不及赴

去日渾如客餞行大漠寒烟凝朔氣

空林殘葉墮秋聲籬邊舊是餐英客省對黃花倍有情
不是藍田別有莊三年此地作重陽先生出郭仍攜酒
獨客登臺又望鄉天濶一鷗盤遠勢風高羣雁起斜行
茱萸諸弟遙相憶應料新來鬢點霜

少司馬楊公見和前詩有登臺把酒之句追憶
落帽臺舊遊已八年矣再次前韻奉酬二首

迢遞關山隔楚城，亂猿啼處記分明。
瘴花瘴草重陽候，秋雨秋風絕徼行。
匹馬幾回經戰壘，荒臺三面走江聲。
再來京洛追陪地，望遠猶含萬里情。

青楓白菊夢漁莊，驚起窗西正夕陽。
賴有新詩酬好節，敢云游子戀他鄉。
風聲捲地迴遼海，山色迎寒入太行。
一片清砧聽不得，敝裘容易改星霜。

得談未菴沙河書却寄

涼燈四壁光燦此，一雙蒞終宵不能寐。
詰旦占有喜起。

接故人書窗日穿故紙披襟再三讀感慨忽中起憶昨
初訂交秋風燕市裏余時新落第邂逅得吾子子名雖
早成尚索長安米才高氣激直罵座酒頻使我故失意
人謂子不宜爾子行將筮仕鸞鳳棲棘枳縣令古難為
位在百僚底上官任喜怒下吏望風旨剛者號木強弱
恐隨波靡不卑亦不抗斟酌具至理子才百事能所少
或在此今年子謁選畿輔得百里是時方旱蝗黽勉到
官始單車行就道奴僕躡生趾近聞沙河城善績紛可

紀賦蛇餘毒去政虎隣邑徙保障安流移枹柝靜奸宄
神明咏來暮父母歌樂只租稅如期輸蒲鞭免撻捶民
譽慰攸歸官聲被褒美寧非讀書力出手見根柢乃知
賢豪人未可私意擬向來吾錯料失語徒抱耻感子諒
我真肝膽終見委得路念貧交幾人堪屈指自傷志力
薄無以赴知己行當賦歸耕塵俗庶一洗願子益自愛
友道在永矢前期不遐遺折東到桑梓

次大冶司農韻送顧與田還金陵二首

及見開東閣俄聞把別觴沙痕雙鬢雪寒色一裘霜老
覺游情倦貧銜故意長獨留青眼在此外任炎涼
一片隨陽雁郵程取次過馬頭回紫塞冰面渡黃河手
寫還丹訣神傷過闕歌承平風物似遺老剩元和

奉送少司馬楊公

予告養親四首

聖朝孝治在敦倫

詔許還鄉為養親平格已推黃閣老

公今年適周花甲

行期先

報白頭人卷舒在我何關命進退無慙好乞身此日魏
舒仍襪被却從去國始知貧

從開絕域震餘威悵望多年予舍違退自急流從古少
老猶孺慕似公稀東門祖帳傾城出北闕

恩光拜表歸畫錦堂開春晝永笑將綵服換朝衣

萬事長安一局碁角中私第未嫌遲即論世道寧無補
欲報

君恩况有期春服暫寬腰下組茶烟初驗鬢邊絲粉榆

父老來迎謁應羨精神似舊時

油幕追隨萬里過兩年假館又蹉跎吟聯樺燭枝枝跋
酒上塵顏夜夜醜含意每為知己盡不才真怕受恩多

公歸我客全無為誰聽荆南寡和歌

時余將移館北門

敬業堂詩集卷七